

Minister di Husticia Arthur Dowers

Instigacion riba caso di graf di Betico Croes tin cu para

Mester laga husticia haci su trabou

ORANJESTAD – Tur trabou tecnico ta haci caba pa loke ta e caso di e graf di Betico Croes, y awor ta trahando riba e parti di investigacion mes. Esaki ta palabra di Minister di Husticia Arthur Dowers cu a mostra cu su ministerio tin e caso aki bou di ‘control’ for di momento cu e la wordo notifica ayera door di mando policial di e suceso.

Tabata despues di a wordo notifica pa mando policial diadomingo, cu e mes a tuma contacto cu yiu di Betico esta Juni Croes y a trata e caso aki cune.

Segun Dowers, confirmando loke ya caba a wordo treci dilanti caba, e acto ta uno castigabel pa ley, y como tal esnan cu ta responsabel pa e acto horendo aki lo mester wordo atendi corectamente ora cu nan wordo captura.

Mes momento Dowers a mus-

tra cu, cu e caso di diadomingo e respet cu mester tin pa defunto a wordo viola.

“E investigacion tecnico a bay bon” Dowers a bisa, indicando mesora tambe cu por a confirma cu den e caha tur cos tabata intacto cu sigur ta un tranquilidad pa e famianan di Betico Croes.

Esaki pasobra cu e caha habri, tabatin e miedo cu lo a horta parti di esaki y unda cu tabatin rumor cu lo a horta partinan y tambe te hasta e bachi. Esaki a keda desmenti pa Minister Dowers ayera tambe.

Aworaki autoridad ta tratando e investigacion di otro angulo, y ta spera cu comunidad lo sa di coopera manera semper e ta haci, door di raporta cualkier cos cu nan lo por a mira na Santana na Santa Cruz durante oranan di diadomingo marduga of diasabra anochi ora cu e acto malo lo mester a tuma luga.

Dowers a haci peticion mesora tambe pa stop di tira gasoline riba e herida y pa no instiga otro riba e asunto aki. “E asunto tin cu para aki” Dowers a sigui na bisa.

Loke e mandatario ta lamenta sigur ta cu hendenan tabata acusa otro di tabata meti den esaki. A bay asina leu di uza su nomber como un di e responsabelnan.

A finalisa bisando cu ningun hende no mester dicidi pa husticia y saca conclusion sin cu e trabou di husticia a wordo haci. Ta husticia ta esun cu na final por saca cualkier conclusion y como tal a pidi pa comunidad stop di haci esaki y laga husticia haci su trabou. □



Minister di Husticia Arthur Dowers

PPA: Mishi cu graf di un defunto ta inacceptabel

ORANJESTAD - Partido PPA a tuma nota di e sucedido lamentabel na graf di sr. Betico Croes q.e.p.d. Esaki ta un acto cu PPA ta condena cu tur forza !

E ta demonstra un falta di respet pa nos comunidad Arubano. Y e ta demonstra un falta di respet pa sr. Betico Croes q.e.p.d. cu como un ciudadano- politico a destaca y a guia nos pais pa cambianan importante y impactante den desaroyo di nos pais riba tereno estatal. Sin kita afo su contribucion na gobernacion di nos pais.

PPA ta uni su mes na tur otro persona y instancia den nos pais cu awe ta bisa cu esaki ta inacceptabel y condenabel. Nos ta spera cu autoridad lo sa di pone man riba esnan responsabel pa e acto reprochabel y bochornoso aki.

‘Mishi cu graf di un defunto ta inacceptabel’ y si esaki ta un desaroyo (nobo) cu cual nos sociedad lo mester tene cuenta cu- nele anto nos ta urgi esnan responsabel pa adapta nos leynan di tal indole cu ta aumenta e castigo pa e delito aki severamente. Cu sr. Betico Croes sosega na paz !